



SINUARIA POETARUM: POESIA, CANTU, BELLESA E ISPANTU

de Domitilla MANNU

Sinuaria poetarum, Isula de sos poetas est su nòmene de sa Festa de sa Poesia in limba sarda chi s'est tenta, su 7 e 8 de cabidanni in s'Asinara. Unas chentu

Ossario austriaco - foto Andrea Fancellu



personas sunt isbarcadas dae su traghettu sàpadu 7 a manzanu, e luego, acumpanzadas, dae una "ghia turistica a primore" ant fatu sa prima visita a Fornelli " Li Furreddi". Eugenio Cossu, espertu connoschidore de s'Asinara, e primu Presidente de su Parcu, at ammentadu fatos istòricos e contadu de

sa vida de sos presoneris. A pustis de sa vèsita, su biazu est comintzadu; sa zente est setzida in duos trenigheddos chi trasportant sos turistas dae unu cabu a s'àteru de s'ìsula e chi permitint de ammirare sa bellesa e s'ispantu chi sa natura offerit. Dae Fornelli e passende a Santa Maria, Li Stretti, Tumbarinu, fintzas a s'Ossàriu de sos 7 miza soldados austriacos, presoneris de sa prima gherra mundiale, mortos de colera. In mudesa e cun coro pienu de làstima, sos presentes ant iscultadu su Coru Gabriel



chi at cantadu su *Miserere*, Clara Farina, brava che semper, at cantadu una poesia de Antoninu Mura Ena, *Banditore chin trumba* e chie iscriet at lèghidu una poesia de Istevene Flore dedicada a sa memòria de cussos mortos. Su biazu est sighidu fintzas a Cala Reale, cun carchi frimmada in logos nòdidos e in sos puntos pius panoràmicos. Dae s'Ossàriu deretu a Cala Reale; a primu borta e die una mirada a Trabuccato e posca a Cala d'Oliva, in ue su sàpadu sero a sas 9, in sa Diramatzione Tzentrale s'est tenta sa serada de poesia e cantu; su mamentu pius isetadu e de sas duas dies. Sunt istados protagonistas una grustu de poetes, intre sos mezus de Sardigna; Antonello Bazzu, Mario Marras, Eugenio Cossu, Piergiuseppe Branca pro su limbazu tataresu, Giuseppe Tiroto pro su casteddanu, Gigi Angeli pro su gadduresu, Carlo Demartis pro su cadalanu de s'Alighera, Anna Cristina Serra, Franco Piga, Andrea Chessa e Istèvene Flore pro sa limba sarda. Clara Farina at resadu e cantadu, cun passione, poesias de Vincenzo Pisanu, Giuanne Fiore e Frantziscu Màsala. Sos poetes ant resadu sas poesias issoro chi trataiant sos

temas de su traballu, s'ìsula, su mare, sos isteddos. Su Coro Gabriel de Tèmpiu, a intramesu de sas poesias at cantadu e incantadu su publicu cun unas cantones de sas mezus de su repertòriu sou. Ant abbertu e tancadu sa serada s'Assòtziu "Errabonda Fabrizio Pittalis" de Portu Turre cun sos artistas, Frankie Fancello e Francis Milia cun un'ammentu in poesia de



Fabrizio Pittalis. Sighidu cun atintzione est istadu s'arrejonu de s'astrònomu, Michele Forteleoni chi at illustradu, su chelu isteddadu in s'incantu de sa note. Sa dominiga sunt sighidos àteros mamentos improvisados de poesia e onzune at pòtidu lèghere una poesia sua o de àteros poetes mannos comente Nino Fois, portuturresu de nàschida e in àteros tempos maestru de iscola in s'Asinara. Si podet nàrrere cun rejone e segurìa, chi est istada una esperièntzia agradessida e de repìtere. Poesia, amistade, e bellesa, sunt sas peràulas chi si sunt intesas in buca de sas pessones e gia custu podet dare s'idea de sos sentidos chi si sunt ischidados in coro de totu sos chi ant vìvidu custa festa de sa Poesia. Duas dies maravizosas de ammentare, ordinzadas a primore, sena pedire dinari a Entes Publicos. Sa bona resessida e cantu siat istadu pretziadu totu s'ammànizu est istadu testimoniadu dae totus, cando saludende-si, s'ant dadu pari pari, s'abbòju a un'àter'annu. Creò chi custa siat istada una manera dèchida pro torrare gràtzias a Antonello Bazzu, Mario Marras e Eugenio Cossu chi b'ant postu tempus, infadu e coro. "A àteros annos mezus".

Tàtari14/ 9/ 2013